



協學香大牛
會者港學津

辛丑（2021）新春文告

雪玷方庭，秋芳未盡憐殘綠。鐘音何促，佳節何瑩獨。
遠目天央，鄉國誰傳囑。歌一曲。大千來復，昂首迎東旭。

——〈點絳脣·辛丑元旦待旦〉

晨磬醒津市，滔風仰翠峯；
曇河昇旭日，垂柳接初春。

——〈辛丑津城元旦〉

庚子鼠去，辛丑牛來。牛津香港學者協會敬賀諸君身心添福、教研有成、闔家康泰。

去歲以還，疫癘為災。國則封關，市則休門，家則閉戶。縱有八百之速，難敵江洋之隔；雖具御車之藝，奈何跨洲之遠。然疫癘相仍，不泯人情；封禁密接，無損繫結。敝會年來略守己職，戮微力、盡熾心，力維會務不墜。一遵王命，動避跨戶之接；萬慮民安，靜嚙網聚之趣。箕裘雖難紹繼，諸君幸賜原宥。月前學術盛匯（Academic Symposium 2021），嘉賓雲集，熱心於斯尤見，盛情由是大顯。敝會當電敏其力，繼踵前成，疫鎖雖厲，奮發莫止。

敝會名蘊學者，乃偕諸君同肩其責。擔時代更革之旗，負學問承傳之職。孜孜營營，焚膏繼晷，揚厲美善，捨身勇往。揆諸典籍，《荀子》以〈勸學〉啓卷、《禮記》有〈學記〉一篇，皆論學鴻文，彰彰明示學不可以已，而學之善也足以動眾化民。蕞爾香港，百載艱辛，昔為漁港，今廁名城，正緣代代港人，不懈不怠，拓荒野以韞路，營生計以藍縷。近歲港事蝸蟻，大變之局，世所未睹。學者諸君，務須更勤於學、務須更深於事、務須更明於理，博學慎思，細覽全局。綜前車之鑑，發未發之覆；總先哲之智，彰未明之明。人文、社科、理工、商管諸科，自實務觀之，千差萬別；然自益於世道人心論之，則各擅其工、各司其職。是以，諸君雖自八方，苟能一心建港，存良知、衛正道、僻邪說，復交賢自省，日進於學，則旭日出平地矣。丑年尚牛，而牛德甚蕃。一者任勞怨，力耕不息；二者善低頭，不務佔先；三者功不居，所產歸眾；四者性堅忍，不改其道。凡此四德，悉香港成功要訣。吾人當習牛之佳德，報於社稷。

惡癘經年，如日月雨露，不擇於人。巨錢萬貫大賈，命不輕保；至位高權將相，身難言脫。四海疫鎖，黎民眾庶，莫不引頸望救，待還昔盛。疫苗姍姍而來，屢遭變故；頑毒洶洶而播，常時演化。社經諸方，恐難速歸平常。牛津諸子，勿論滯英在港，坐則困守四壁，行則徒及食用。事雖甚艱，然世道維難，實變革良機；心念堅忍，乃恆久至道。以既新既巧之知，戰既艱既久之困；賴所受所傳之道，新所處所寶之世。虛擬世界承其天運，勃然大興。時區無隔其會面；萬山難阻其傳音。是以疫癘雖云凶，速流四野；聯繫未為斷，迅達八方。風雲雖迭變，科技恆飛躍。今乃時機天授，適足革其舊俗、習其新事。居家辦公之便、處室學習之趣、聯網經商之利，昔在幻想，今成事實。坐守書閣，撫四海於一瞬；勞形案牘，合眾力於萬邦。今乃變革更新之時，願吾人同心互勉、奮發砥礪，力求既博且專，學有小成，而為大變之香港、東亞、世界，求一可由正路。《易》曰：「天地革而四時成」、「革之時義大矣哉」，今歲星移次，周天更易，大地回春，人間豹變，其義亦在斯乎？

一元復始，再祝我會諸賢定計於春、百尺竿頭、學富五車、汗牛充棟。拜送諸君春聯一副：

香島香燈，願榮燦歸香港
牛年牛鐸，望疫苗出牛津
橫批：一生平安

牛津大學香港學者協會
聯席會長

柏嘉



陳柏嘉

於牛津介立山房

志濠



鍾芯豫

於香港

辛丑牛年元旦（2021.02.12）

✉ oxhk.scholars@studentclubs.ox.ac.uk

📖 oxhkscholars.web.ox.ac.uk

📘 www.facebook.com/OxHKScholars

📍 Oxford, United Kingdom